

Opitz, Martin: Auff Herrn Sebastian Namßlers Hochzeit (1624)

1 So oft ich bey mir selbst/ (wie ich zuthun dann pflege/
2 Der Liebe lauff vnd art mit allem fleiß erwege/
3 Befind ich allezeit/ daß jhre Tyranny/
4 Nur sey ein blosser Wahn/ vnd blinde Fantasey.
5 Die Venus ist die Zier der freundlichen Jungfrawen/
6 Damit sie prangen thun auff art der stoltzen Pfawen/
7 Damit sie vnser Hertz vnd Sinnen nehmen ein/
8 Darauß entspringen muß die bitter süsse Pein.
9 Sie brechen sich herauß: Ihr trachten vnd jhr sinnen/
10 Ist einzig vnd allein/ wie sie vns fangen können/
11 Der Kopff vor Schmuck sich beugt/ die Stirne glantz herfür/
12 Der Wein ist reiff vnd feil/ der Krantz hengt vor der Thür/
13 Doch kan vns sonderlich der Augenglantz versehen/
14 Das wunderschöne Liecht thut allesamt bethören/
15 Die Augen sein die Straß/ die Augen sein der Steg/
16 Dadurch in vnser Hertz Cupido trifft den Weg.
17 Gantz schön vnd meisterlich die arge Damen wissen
18 Die runden Kügelein jetz hin jetz her zuschissen/
19 Bald trucken sie sie zu/ bald werffen sie sie auff/
20 Biß endlich wir gemacht den thewren Liebeskauff.
21 Da haben wir sie denn/ daß vnser standthafft Hertze/
22 Kunst/ Weißheit/ Lob vnd Ehr/ muß weichen solchem schertze/
23 Das Griechisch vnd Latein wirdt vns gar vnbekandt/
24 Für Plato nemen wir den Amadis zu Handt/
25 Das kan ein Weibesbildt: Bald will sich der erhencken/
26 Vor vnerhörter Brunst/ bald will sich der ertrencken/
27 Der Thränen weite Bach auß beyden Augen quillt/
28 Voll seufstzen ist das Hertz: Das kan ein Weibesbildt.
29 O wie glückseelig ist Herr Breutigam das Leben/
30 In das jhr euch jetzt wolt mit ewrem Lieb begeben/
31 Ihr liebet ohne Forcht/ in wahrer Freundlichkeit/
32 Ihr seyt von Liebes Pein gantz sicher vnd befreyt.
33 Wir müssen mit Gedult an Venuswagen ziehen/

34 Vnd vns bey Tag vnd Nacht mit jhrem Joch bemühen/
35 Wir sehen Angst vnd Noth/ jhr sehet Hülff vnd Rath;
36 Was bey vns Hoffnung ist/ das wirdt bey euch die That.
37 Nun wohl: Gebrauchet euch der guten Zeit vnd Stunde/
38 Vnd heylet freundtlich zu die zarte Liebes Wunde.
39 Cupido hat gesandt den Hymen allbereit/
40 Daß er der Jungfrawfchafft soll geben das Geleit.
41 Vnd jhr/ O schöne Braut/ wolt euch nur gern ergeben/
42 Es ist doch nicht zum Todt/ es ist viel mehr zum Leben.
43 Wir aber lassen noch die süsse Wercke stehn/
44 Biß es vns dermal eins auch wirdt so wol ergehn.

(Textopus: Auff Herrn Sebastian Namßlers Hochzeit. Abgerufen am 23.01.2026 von <https://www.textopus.de/poems/10>)